

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XL Blg. 13  
Hulyo 7, 2009  
[www.philippinerevolution.net](http://www.philippinerevolution.net)

Editorial

## Lubusang biguin ang OBL2

**B**igung-bigo ang kontra-rebolusyonaryong kampanyang Oplan Bantay Laya 2 (OBL2) ng rehimeng US-Arroyo at ng Armed Forces of the Philippines (AFP). Sa kabila nito, pinalalabas pa rin nilang madudurog na ang Bagong Hukbong Bayan (BHB) bago matapos ang kasalukuyang termino ni Gloria Arroyo sa 2010. Palagian pa rin nilang sinasabi na bunga ng kampanyang militar na OBL2, ilampu nang mga larangang gerilya umano ang nalusaw at libu-libo nang mga pwersa ng hukbong bayan ang nalagas.

Kabaligtaran ang ibinunga ng OBL2. Lalong lumalawak ang hukbong bayan dahil sa galit ng masa sa inihahasik nitong kalupitan, sa sobrang pagkabanat ng mga pwersa ng kaaway at sa determinasyon at pagkatuto ng mga rebolusyonaryong pwersa sa paglaban. Dumarami sa halip na nabawasan ang mga larangang gerilya. Nagagawa ng BHB na maglunsad ng di bababa sa isang taktikal na opensiba bawat araw.

Maraming mahahalagang aral na natututunan ang mga rebolusyunaryong pwersa at masa sa harap ng pinag-ibang bangis n g OBL. Ang pinakamahalaga rito'y habang lalo silang inaapi, sinusupil at ginigipit, tiyak na lalaban at lalaban ang mamamayan.

Mula nang ilunsad ang OBL2, ilan lamang sa mga lugar kung saan pinakamatingkad ang pagkabigo nito ang Mindanao, Eastern Visayas, Panay, Negros, Southern Tagalog at Bicol. Sa mga lugar na ito, walang nawasak ang kaaway ni isang larangang gerilya sa kabilang ng pinatindi at malalaking operasyong militar.

Umaasa ang rehimeng US-Arroyo na makababawi ito sa mga kabiguan at pagkatalo at makapagpapakita ng lakas militar upang mapangatawanan ang paghahangad nitong makapangunyapit sa poder lampas pa sa 2010. Habang papalapit na ang itinakda nitong dedlayn, desperadong nagkukumahog ngayon ang naghaharing rehimen sa lalong walang habas na pananalakay, pamamaslang, panliligalig, intriga, paninira, kasinungalingan at iba pang pang-aa-

buso. Milyun-milyong mamamayan ang mabibiktima ng pinaigting na mga pasistang pananalakay.

Sa mga nalalabing buwan ng taong ito hanggang sa tanging ng OBL2 sa susunod na taon, haharapin ito ng lahat ng rebolusyonaryong



**Mga tampok sa isyung ito...**

**Mga pakanang ala-Marcos**

PAHINA 3

**8 armas nasamsam sa reyd sa Agusan del Sur**

PAHINA 6

**Si Ka Cesar, rebolusyonaryong ama at lider**

PAHINA 10

pwera nang buong determinasyon, sigla at paglaban upang lubusang mabigo ang kampanya ng kaaway at ibayong maisulong ang rebolusyonaryong kilusan at ang digmang bayan tungo sa mas mataas na antas.

Hindi dapat hayaang makapaghambog at makapaminsala ang papet na rehimeng Arroyo at ang mga pasistang heneral nito. Dapat ipamukha nang walang pasubali ang ganap na pagkabigo ng OBL2 at ilantad, ihiwalay at pagbayarin ang naghaharing rehimen at mga pasistang pwera nito sa lahat ng mabibigat nilang krimen sa mamamayan. Dapat ipakita sa lahat ang determinasyon ng BHB na lumaban nang pukpukan sa mga pananalakay ng pasista at papet na estado at tuluy-tuloy na isulong ang armadong rebolusyon.

Ang ikalawang hati ng 2009 hanggang kabuuan ng 2010 ay napakainam na panahon para sa pagpapaigting ng mga taktikal na opensiba at pagsusulong ng rebolusyonaryong kilusan sa buong bansa, lalo't matinding niyanig ngayon ng mga sosyo-ekonomiko at pampulitikang krisis ang naghaharing rehimen at buong sistemang

tinutungtungan nito.

Ang dinaranas na krisis ng buong naghaharing pandaigdigang sistemang kapitalista ay lalong nagpapatindi sa permanenteng krisis sa bansa at ibayong yumayanig ngayon sa naghaharing rehimen. Ang pagbagsak ng kabuhayan at lubhang pagkakahiwalay ng naghaharing rehimen sa bansa ngayon ay maihahalintulad sa katindihan ng krisis noong 1983-86 na yumanig at tuluyang nagpabagsak sa diktadurang Marcos.

Nagkakagulo rin ngayon ang mga reaksyunaryo dahil sa kaliwa't kanang marurumi at mararahas na pagmamaniobra ng naghaharing paksyong Arroyo upang mangunypit sa poder at mahigpit din ang pakikipagpaligsahan ng iba't ibang karibal na paksyon upang makangat sa kapangyarihan.

Ang AFP naman ay patuloy na nililigalig ng internal na paksyunalismo at mga alitan laluna sa harap ng talamak na korapsyon at garapal na pagpabor sa promosyon ng mga paborito ni Arroyo. Nagmamaniobra si Arroyo upang maipwesto ang paborito at pinakamapagkakatiwalaan niyang heneral sa tuktok ng AFP bago ang 2010 at sa gayon ay

mahawakan ang buong militar. Ngunit lalo lamang nitong pinalalala ang hidwaan sa loob ng AFP at hinahamon ang ibayong paglaban ng mamamayan at oposisyon sa panibagong paghaharing militar.

Dati nang hiwalay sa mamamayan at kinamumuhian ang AFP dahil sa kabulukan, kriminalidad, kalupitan at pagpapakatuta nito sa imperyalismong US. Banat na banat ito sa hangaring saklawin ang pinakamaraming larangang gerilya. Kaya't madaling nagagapi ng hukbong bayan ang maliliit na hiwa-hiwalay na pwera nito. Humihingi ang AFP ng dagdag pang tropa at sandata, ngunit gipit din sa badyet ang estado. Pinasasahol pa ito ng talamak na korapsyon nina Arroyo at mga alipures niyang malalaking burukrata, pulitiko at heneral. Nagdudulot ito ng malawak na demoralisasyon sa hanay ng mga karaniwang sundalo.

Sa kabilang banda, ang hukbong bayan ay tumatamasa ng malawak na suporta ng sambayanan. Napanday ito sa apat na dekada nang pagsusulong ng armadong rebolusyon. Patuloy na nag-iipon ang mga rebolusyonaryong pwera ng mga tagumpay at mayamang mga aral at kaalaman sa paglaban sa todo-gera ng AFP at sa pagpapaunlad ng mga rekisito para sa mas malaganap, mas masinsin at mas abante pang pakikidigmang gerilya sa buong kapuluan.

Dapat sagpangin ng buong armadong rebolusyonaryong kilusan ang ibayo ngayong umiigting na krisis sa ekonomya at pulitika para mas palawakin at paigtingin ang pakikidigmang gerilya. Dapat ding sagpangin nito ang labis na pagkakabanat at pagkakahiwalay ng mga pwera ng AFP, at pasiglahin ang mga taktikal na opensiba.

Dapat palakasin ang pamumuno at paggabay ng mga komite ng Partido at kumand ng hukbong bayan at engganyuhin ang inisyatiba at



Taon XL Blg. 13 Hulyo 7, 2009

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.net](http://www.philippinerevolution.net)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

## Nilalaman

### Editorial

Lubusang biguin ang OBL2	1
Mga pakanang ala-Marcos	3
Papel ng US sa pulitika at eleksyon	4
Bilyun-bilyon, nilulustay sa byahe	4
Mga mangingikil, nagkukunwang BHB	5

### Matatagumpay na TO

Reyd sa Agusan del Sur	6
Ambus sa Capiz	6

### Pananalanta ng pasistang estado

Mga komunidad ng Tumanduk, binomba	6
Aktibistang doktor, pinatay	7
Pang-aabusong militar sa Abra	7
Rehimeng Arroyo at AFP, idedemanda	8
Pinsala sa isip dulot ng pasismo ng estado	9
Kalusugan ng isip ng mga kasama	9
Si Ka Cesar, rebolusyonaryong ama at lider	10

### Sa ibayong dagat

Pinatitinding mga gerang agresyon ng US	11
Pambobomba ng mga drone	11

Balita	12
--------	----

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

kapangahasan ng lahat ng mga larangang gerilya at mga platung gerilya ng BHB para maglunsad ng mga taktikal na opensibang ayon sa kakayahan, pagsagpang sa mahusay na mga pagkakataon at matitiyak na tagumpay. Dapat magdulot ng maraming maliliit at malalaking suntok sa katawan sa iba't ibang dako ng bansa—sa loob ng mga rehiyon, sa pagitan ng mga rehiyon sa mayor na mga isla at sa pagitan ng mayor na mga isla ng bansa. Kasabay nito, dapat magsagawa rin ng mga piling bigwas sa ulo sa mga sentro ng kaaway. Dapat magbigay ng partikular na pansin sa mga opensibang may matingkad na katangian at epek-

tong pulitikal, gayundin sa mga kinakailangang gawaing pampulitika at propaganda at pakikipagsagutan laban sa mga paninira, pagsisinungaling at saywar ng kaaway.

Ang matutunog na tagumpay ng ating mga taktikal na opensiba mula ngayon hanggang katapusan ng 2010 ang lulunod sa pagyayabang at kasinungalingan ni Gloria Arroyo at ng pasistang AFP, magtatambol sa kabiguan ng OBL2 at magsisilbing madagundong na pagtataboy ng mga rebolusyonaryong pwersa at mamamayan sa huwad at bulok na presidenteng lubhang kinamumuhian at iwinawaksi ng sambayanan. **AB**

## Mga pakanang ala-Marcos

**L**abindalawa na ang namamatay at mahigit 80 na ang nasusugatan sa serye ng mga pambobomba sa Cotabato City; Jolo, Sulu; at Iligan City nitong Hulyo 5 at 7. Pinasabugan din ang mga tore ng National Transmission Corp. sa Kauswagan, Lanao del Norte nitong Hulyo 7. Naganap ang serye ng mga pambobombang ito matapos pasabugan ang sentrong bayan ng Datu Piang sa Maguindanao na ikinasugat ng tatlong sibilyan. Bago ito, pinasabugan ng bomba ang *compound* ng Office of the Ombudsman noong Hunyo 28 at kinabukasan, natuklasan ang isang bomba sa Department of Agriculture at sa isa pang gusali sa Quezon City.

Agad na isinisi ng AFP at PNP sa Special Operations Group ng Moro Islamic Liberation Front (MILF) ang pambobomba sa Cotabato City. Ang itinuturo naman ng lokal na upisyal ng Philippine Army ay ang dayuhang teroristang grupong Jamaah Islamiyah. Kaiba naman ang sinasabi ni National Security Adviser Norberto Gonzales. Aniya, kagagawan ito ng isang maliit na grupo ng mga “anarkista” na nakabase sa Kamaynilaan at Central Luzon, pero “panubok” at “pananakot” lamang daw ang pakay ng mga pagbobomba.

Kapansin-pansin ang pagkakahalintulad ng mga pambobomba ngayon sa mga ipinagawa ni Marcos sa mga tauhan ng AFP at PNP sa maraming lugar sa Metro Manila noong 1971 at 1972, bago ideklara ang batas militar. Kabilang dito ang pambobomba sa Plaza Miranda noong Agosto 1971 na ikinamatay ng siyam katao at ikinasugat ng mahigit 90 iba pa. Ginamit na sangkalan ni Marcos ang mga pam-

bobombang ito para suspendihin ang *writ of habeas corpus* noong 1971 at magdeklara ng batas militar kalaunan noong Setyembre 1972.

Laluna't ang mas gusto ngayon ng amo niyang imperyalismong US ay matuloy ang nakatakhang eleksyon sa 2010 at maidaan ang mga pagbabago sa “konstitusyunal” na paraan, ang pangunahin pa ring pinagsisikapan nina Arroyo ay mga “ligal” na paraan ng pagpapanatili sa kapangyarihan. Kabilang dito ang pagdaraos ng *constituent assembly* (con-ass) at ang pansamantalang pagtakbo ni Arroyo bilang kongresista sa ikalawang distrito ng Pampanga para makatayong House Speaker habang di pa nababago ang konstitusyon at di pa siya makakapwesto bilang punong ministro.

Pero habang nalalapit ang pagtatapos ng kasalukuyang termino ni Arroyo ay nabibisto at nasasagkaan ang bawat pag-usad ng kanyang mga “ligal” na pakana para

makapanatili sa poder. Sa gayon, naglalabasan na ang mas marurumi, tahasang iligal at pasistang pakana ni Arroyo para mapalawig pa ang kanyang terorista at bulok na paghahari, kabilang ang paggaya niya sa mga taktika at pamamaraan ni Marcos.

Minamadali nina Arroyo at mga alipures niya ang paglalata ng mga senaryo para mabigyang-kawiran ang paggamit niya ng kapangyarihang pang-*emergency* oras na mabigo ang lahat ng kanyang mga “ligal” na gimik, kabilang na ang pandaraya sa darating na eleksyon at pagraratsada ng pagbabago sa konstitusyon.

Kabilang sa mga senaryong inihahanda nina Arroyo ang di pagtuloy sa eleksyon o kaya'y pag-udyok ng ganap na kaguluhan sa eleksyon para magsilbi siyang “pangulong pantransisyon” at maipagpatuloy niya ang kanyang pamumuno. Gumagawa na rin siya ng mga hakbangin para maipilit ang mas magandang pagreretiro ng kasalukuyang hepe ng AFP na si Gen. Victor Ibrado upang mailuklok ang pinakamatapat at pinakamaasahang heneral ni Arroyo na si Lt. Gen. Delfin Bangit bago ang takdang pagreretiro ni Ibrado sa Nobyembre. Sa pamamagitan ng pagpupwesto kay Bangit sa tuktok ng AFP, matitiyak nina Arroyo ang kontrol nila sa buong pwersang militar sakaling magpataw sila ng *state of emergency* o tahasang batas militar. **AB**

# Ang papel ng US sa pulitika at eleksyon sa Pilipinas

**M**ahaba na ang kasaysayan ng mahigpit na pakikialam ng US sa pulitika ng bansa. Sa tuwiran at di tuwirang paraan, nailuluklok nito ang mga papet na rehimen na nangangalaga sa pang-ekonomiko, pampulitika at pangmilitar na interes nito sa mga neokolonya nito. Kinakasangkapan nito ang mga eleksyon at iba pang paraang labas sa eleksyon tulad ng kudeta, pagpapakana ng mga kaguluhan at iba pang paraan.

Ang basbas at suporta ng kaniyang imperyalistang amo ang isa sa pinakaaasam-asam ng mga reaksyunaryong pulitiko. Kasalukuyang sikretong nakikipag-ayos si Arroyo sa US para sa katanggap-tanggap na mga paraan upang makapanatili pa rin siya sa poder. Inaakit ni Arroyo ang suporta ni Pres. Barack Obama ng US gamit ang "cha-cha" at ang planong iwaksi ang mga probisyong nagbabawal sa mga danyuhan na magmay-ari ng lupa at mga estatehikong industriya sa bansa. Tiwala ang US kay Arroyo matapos nito patunayan ang pagiging masugid na papet nitong nag-

daang siyam na taon. Ang inaalala lamang ng US sa pananatili ni Arroyo ay ang posibilidad na ang malawak at sukdulan nang galit ng mamamayan sa kanya ay lalo pang makapagpalala sa krisis ng naghaharing sistemang pampulitika na magbibigay puwang sa ibayo pang paglakas ng mga ligal at armadong patriyotiko at rebolusyonaryong pwersa.

Maaaring suportahan ng US ang paggamit ng dahas ng kasalukuyang naghaharing papet, katulad ng ginawang pagsuporta nito kay Marcos at iba pang diktadura noong nakaraan. Gayunpaman, batid

ng US na lalo lamang nitong palalain ang tunggalian ng mga reaksyunaryo, pag-aapuyin ang galit ng mamamayan at pasisiklabin ang panibagong mga pag-aalsa. Alam din ng US na hindi nito lubusang mapanghahawakan ang isang lantarang paghaharing militar sa harapan ng kasalukuyang pagkakabitakbitak ng AFP at mahinang hawak dito sa ngayon ni Arroyo.

Nakikita ng US na mas paborable kung matutuloy ang eleksyong 2010. Ipinahayag nito kamakailan ang "pagkabahala" sa posibleng kaguluhan kung di itutuloy o mabibigo ang darating na eleksyon sa iba't ibang dahilan, kabilang na ang lubos na pagkakagulo ng *automation* ng eleksyon, at dumaraming banta at senaryo ng karahasan.

Kasabay ng pagresolba sa magiging tindig nito sa pagpapalawig ng kapangyarihan ni Arroyo, nakikipag-usap din ang rehimeng Obama sa iba't ibang reaksyunaryong oposisyon sakaling magpasya itong magpalit na ng punong tuta. **AB**

## Bilyun-bilyon, nilulustay sa pagbibyahe

**U**maabot na sa mahigit P6 bilyon ang nilustay ni Gloria Arroyo sa dalas at dami na ng kanyang pagbibyahe mula nang maupo siya noong 2001. Di pa kasama sa kwentang ito ang mga nagastos sa mga byahe ni Arroyo nitong huling mga buwan.

Bukod sa ilang upisyal na pakay, marami sa mga byaheng ito ay nagsisilbi na ring pagliliwaliw para sa pamilyang Arroyo, pabuya sa kanilang mga alipures at pagkakataon para sa mga "pribadong" lakad ng mga Arroyo.

Noong Disyembre 2007, halos 200 katao ang sumabit sa byahe ni Arroyo sa France, Spain at United Kingdom. Kabilang dito ang 34 na mambabatas na bumoto para mai-basura ang ikatlong kasong *impeachment* laban sa kanya. Ginastusan ng US\$9,000 ang bawat isa sa kanila, bukod pa sa kanilang

mga asawa at iba pang kasama. Kasama rin sa ginastusan ang tatlong senador, 50 alyadong negosyante, ang asawa ni Arroyo na si Mike, ang kanilang tatlong anak at apat na apo, kasama pa ang mga yaya. Umabot sa \$5,000 ang halaga ng tiket sa eroplano ng bawat isa. May alawans na panghotel din ang bawat isa na \$500 bawat gabi at may baon pang tig-US\$3,000 bawat araw. Lahat ng ito ay ipinapa-



pasan sa mamamayang Pilipino.

Nito namang Pebrero, P123 milyon ang upisyal na nagastos ni Arroyo sa walong araw niyang byahe sa Dubai at tatlo pang bansa sa Middle East. Mahigit 60 ang nakasama niya sa delegasyon. Sumaglit din siya sa US para maghabol ng pagkakataong malitratuhan man lamang sana na kinakamayan ng bagong luklok na pangulo ng US, pero hindi siya pinansin noon ni Obama.

Bukod sa nalulustay na rekursong sa mga pagbibyaheng ito, kwestyunable rin ang pakay ni Arroyo sa ilang lugar. Noong Hunyo, na-

ging kaduda-duda ang biglang pagsingit ni Arroyo ng “pribadong” byahe sa Colombia at sa Barbados, sa pagitan ng kanyang mga upisyal na pagbisita sa Japan at Brazil. Ang mga bansang Colombia at Barbados ay kabilang sa mga bantog na lagakan ng mga nakaw na yaman. Sobrang sikreto ng byahe ni Arroyo na hindi niya isinama maging ang kanyang pwersang pansegu-ridad.

May pagkakahalintulad ang misteryo sa biglaang byahe ni Arroyo sa Colombia at Barbados sa biglaan ding “pribadong” byahe ng mag-asawang Arroyo sa Shenzhen, China noong 2006. Nagresulta ito sa ma-anomalyang proyektong NBN-ZTE.

Maraming kritikong mahigpit na nagmamanman sa bawat galaw ng rehimeng Arroyo ang nagsasabi na maaaring may kinalaman ang byahe sa Colombia at Barbados sa biglang paggawad ng P7.2 bilyong kontrata sa misteryosong kumpanyang Smartmatic para isaayos ang sistema ng de-kompyuter na bilangan sa darating na eleksyon sa 2010. Ang Smartmatic, na sangkot sa iba pang maanomalyang halalan sa ibang bansa, ay nakabase sa Barbados.

Kaduda-duda ang kalalabasan ng de-kompyuter na

bilang sa darating na eleksyon dahil sa lumalabas na kwestyunableng ugnayan nina Arroyo at Smartmatic. Batayan din sa pagdududa ang nabunyag na malaon nang ugnayan ng mag-asawang Arroyo sa Total Information Management Corporation (TIM) na magsisilbing lokal na kasosyo ng Smartmatic.

Mula sa Caribbean ay dumaan na naman si Arroyo sa Dubai, gayong kagagaling lamang niya roon wala pang dalawang buwan ang nakararaan. Ang idinahilan niya dati sa pagparoon ay ang pangangalap umano ng mga bagong trabaho para sa mga manggagawang Pilipino, kahit bagsak ngayon sa pandaigdigang resesyon ang ekonomya ng Dubai. Pero ngayo’y naging tahimik ang Malacañang. May impormasyong malaki ang sinubaybayan ni Arroyo na mga sikretong puhunan don. Ang Dubai, tulad ng Colombia, Barbados at ilan pang bansa sa Caribbean ay lagakan din ng malalaking kriminal ng kanilang yaman.

Sa gitna ng napakaraming batikos hinggil sa napakalaking ginagastos sa mga byaheng ito, nakatakda na namang umalis si Arroyo sa Hulyo 15 para dumalo sa pagpupulong ng Non-Aligned Movement sa Sharm El Sheikh, Egypt. **AB**

## Mga mangingikil, nagkukunwang BHB

**K**asabay ng pinag-ibayong mga operasyong militar laban sa armadong rebolusyonaryong kilusan, pinatitindi ng rehimeng Arroyo at ng AFP ang kampanyang paninira nito laban sa Partido, Bagong Hukbong Bayan (BHB) at mga lider nito, lalupa’t nalalapit na ang itinakda nilang dedlayn para sa hibang nilang pangarap na gapiin ang BHB.

Laganap ngayon sa buong bansa ang ekstorsyon sa mga negosyante, propesyunal, karaniwang kawani at abang naghahanapbuhay na ginagawa ng AFP at PNP kakutsaba ang mga sindikatong kriminal. Gamit ang pangalan ng Partido at BHB, layunin ng mga mangingikil na sirain ang prestihiyo ng rebolusyonaryong kilusan para mahiwalay ito sa malawak na mamamayan. Kasabay nito, limpak-limpak na salapi ang hinuhuthot ng mga militar, pulis at kriminal mula sa nalililang nilang mga biktima.

Isa sa pinakahuling halimbawa ang pangikingil ng isang upisyal paniktik ng PNP ng ilampung libong piso mula sa bawat empleyado ng isang munisipalidad sa Cordillera. Madali siyang nabisto dahil

hindi man lamang niya binago ang kanyang sulat-kamay. Sa isa pa ring kaso sa Cordillera, nakatanggap ng bastos at nananakot na sulat ang mga opereytor ng bus sa dalawang prubinsya. Binantaan ng mga nagpanggap na kadre ng BHB na kung hindi magbibigay ang mga negosyate ng malaking halaga ay susunugin ang kanilang mga bus. Napag-alaman ng Chadli Molintas Command ng BHB sa Ilocos-Cordillera na ang pasimuno ng isang sulat ay upisyal ng pulis, at ang isa pa ay nagmula sa isang nagtraydor sa rebolusyonaryong kilusan.

Nariyan din ang kaso ng paninira kay Leoncio “Ka Parago” Pitao, kumander ng 1st Pulang Bagani Company ng BHB sa Southern Mindanao. Dahil napasinungalinan at

naubos na ang dating mga ibinabatang putik kay Ka Parago, pinaratangian naman siya ngayong nagbubuhay-mayaman sa pamamagitan ng ekstorsyon ng milyun-milyong piso.

Sa isang pahayag nitong Hulyo 5, sinabi ng Partido na mapagpas-ya itong kikiros laban sa mga taong sumisira sa mabuting pangalan ng rebolusyonaryong kilusan at nagpapayaman sa mga upisyal ng militar at pulisya at pinuno ng mga sindikatong kriminal. Nanawagan ang Partido sa mga nabibiktima ng gayong mga pakana ng kaaway na mag-ulat sa kinauukulang mga rebolusyonaryong awtoridad para magawan ng agarang aksyon.

Anang Partido, asahan ang pag-igting ng ganitong mga pakana ng saywar at pagpapayaman ng mga upisyal ng kaaway, lalupa’t lumilina ang pagkatalo ng Oplan Bantay Laya 2 na nakatakdang magtapos sa darating na taon. **AB**



## 8 armas, nasamsam ng BHB sa reyd sa Agusan del Sur

**T**atlong M16, isang M14, tatlong pistolang kal. 45, isang pistolang 9 mm at mga bala ang nasamsam ng mga Pulang mandirigma ng 4th Pulang Bagani Company (4th PBC) ng Bagong Hukbong Bayan (BHB)-Southern Mindanao sa isang walang putok na reyd sa himpilan ng Philippine National Police (PNP) sa bayan ng Santa Josefa, Agusan del Sur nitong Hulyo 1.

Walang nasaktan sa mga pulis sa taktikal na opensibang ito ng BHB. Nakasuot ng mga unipormeng militar ang mga Pulang mandirigma nang salakayin nila ang istasyon ng PNP. Natapos ang operasyong disarm sa loob lamang ng sampung minuto dahil hindi lumaban ang mga pulis. Sa isang pahayag, sinabi ni Ka Nadem, tagapagsalita ng 4th PBC, na iginalang at sinunod ng mga Pulang mandirigma ang International Humanitarian Law na nagsasaad na hindi dapat saktan ang mga elemento ng kaaway na sumuko na at wala na sa katayuang lumaban.

## 2 sundalo napatay, 4 nasugatan sa mga ambus sa Capiz

**H**indi bababa sa dalawa ang napatay at apat ang nasugatan sa serye ng mga pananambang na inilunsad ng BHB sa Central Front sa Panay laban sa 47th IB. Naganap ang mga labanan habang naglulunsad ng malawakang operasyong militar ang mga sundalo ng rehimeng US-Arroyo sa mga komunidad ng mga Tumanduk sa Central Panay.

Ayon kay Ka Julian Paisano, tagapagsalita ng Coronacion "Waling-waling" Chiva Command ng Panay, nangyari ang unang ambus laban sa mga sundalo ng Charlie Coy, 47th IB sa Mt. Cabagol, Barangay Aglinab, Tapaz, Capiz noong umaga ng Hunyo 27. Makalipas ang ilang oras, tinambangan ng BHB ang limang sundalong nagrerekorda sa Sityo Karatagan, Barangay Katipunan sa bayan din ng Tapaz.

Muling inambus noong Hunyo 29 bandang alas-8:45 ng umaga ang isang iskwad ng Charlie Coy na pinamumunuan ni 2Lt. Leo Abulencia sa Sityo Garu, Barangay Acuña sa bayan pa rin ng Tapaz.

Walang kaswalti sa panig ng BHB.

## Mga komunidad ng Tumanduk, binomba

**W**alang pakundangang binomba ng 3rd ID ng Philippine Army ang mga komunidad ng Tumanduk sa kabundukan ng Tapaz, Capiz noong Hunyo 29.

Hindi man lamang nagbabala sa mamamayan ang militar nang paulanan nila ng bomba mula sa kanyong 105 mm ang Mt. Garu. Bunsod nito, nabulabog ang kabuhayan ng mga Tumanduk dahil ang Mt. Garu ang siyang pangunahing daang nagdudugtong sa mabubundok na barangay papuntang kapatagan ng bayan ng Tapaz.

Ilang bomba ang sumabog sa Ganga sa Pan-ay River, ang mayor na rutang ginagamit ng mga magsasakang Tumanduk sa pagdadala ng kanilang mga produktong agrikultural sa sentrong bayan. Natamaan din ng isa pang bomba ang bahay ng isang pamilya sa Sityo Badas, Barangay Tacayan.

Tigil ngayon ang mga kabuhayan ng mga Tumanduk sa Tapaz bunsod ng pag-okupa sa mga barangay ng daan-daang mga sundalo sa pangunguna ng 47th IB. Matinding takot din ang nararamdaman ng mamamayan sa nagpapatuloy na pag-ikot ng mga helikopter sa himpapawid.

Ang pinakakagayat na dahilan ng pambobombang ito ay ang sunud-sunod na pagkatalo ng militar sa mga pwersa ng BHB noong huling linggo ng Hunyo (*Tingnan ang kaugnay na artikulo*). Sa desperasyong makaganti man lamang ay gumamit ang 3rd ID ng mga kanyon at mga helikopter.

Bago ito, tuluy-tuloy ang kampanyang harasment at saywar ng Reengineered Special Operations Teams (RSOT) ng 47th IB laban sa mga magsasaka. Mariing tinututulan ng mamamayang Tumanduk ang pagpupumilit ng militar na pasamahin sila sa ipaparada nilang mga pekeng surrenderi. Tutol din sila sa sapilitang pagrerekluta sa CAFGU at pwersahang pagbubuo ng mga detatsment ng RSOT sa mga baryo.

Hindi totoong namimigay ang militar ng mga punla ng mga gulay sa mamamayan, ani Ka Julian Paisano, tagapagsalita ng Coronacion "Waling-waling" Chiva Command ng BHB sa Panay. Ang totoo'y ang dala-dala ng mga sundalo ay mga armalayt, masinggan at kanyon para agawin ang lupang ninuno ng mga Tumanduk. Dahil dito, aanihin nila ang matinding galit ng mga minorya rito, dagdag pa ni Paisano.

AB

# Aktibistang doktor, pinatay

**I**sang aktibistang doktor ang pinaslang ng militar sa Davao City, isang lider-magsasaka ng Occidental Mindoro ang dinukot sa Taguig at isang namang taong simbahan ang iligal na inaresto sa Misamis Occidental. Sa Maguindanao, hinarang ng mga sundalo ang 52 mamamahayag na naroon para isadokumento ang mga paglabag sa karapatang-tao. Ito ang pinakamatitingkad na kaso ng pang-aabusong militar na nakalap ng *Ang Bayan* nitong nakaraang dalawang linggo.

**Hunyo 30.** Limampu't dalawang mamamahayag ang hinarang sa isang tsekpoynt ng 46th IB sa Barangay Bagan, Guindulungan, Maguindanao at ibinimbin nang isang oras. Papunta ang naturang komboy sa mga bayan ng Datu Piang at Mamasapano para imbestigahan ang kalagayan ng mga bak-

wit sa Central Mindanao. Nang magkainitan na at mariing igiit ng mga mamamahayag na sila'y pakawalan, iniutos ni Maj. Gen. Alfredo Cayton, kumander ng 6th Infantry Division sa Maguindanao na dalhin sila sa kampo ng militar sa Crossing Salvo, Datu Piang.

Mariing binatikos ng National

Union of Journalists in the Philippines (NUJP) ang arbitraryong pagarestong ito. Ani Rowena Paraan, direktor ng NUJP, ito ay paglabag sa karapatan ng malayang pamamahayag at sa karapatang-tao ng mga peryodista.

**Hunyo 29.** Iligal na inaresto ang isang *lay worker* ng United Church of Christ in the Philippines (UCCP) sa isang tsekpoynt sa Tangub City, Misamis Occidental. Si Dennis Paradero Rodinas, 35, ay nakatawag pa sa kanyang asawa na si Deanna noong umaga ng Hunyo 29 para sabihin na hinarang ang kanyang sinasakyan at nasa kustodiya siya ng PNP. Kinahapunan, ipinagbigay-alam umano ng isang upisyal ng PNP kay Gng. Rodinas na dinala ang kanyang asawa sa himpilan ng 55th IB sa Langub, Calamba, Misamis Occidental para isailalim sa interogasyon. Halatang may planong idiin ng militar si Rodinas dahil taliwas sa sinabi niya sa asawa, pinalalabas na nahuli siya sa isang *combat patrol operation* at may dala umanong eksplosibo at mga subersibong dokumento. Inakusahan siyang lider ng Bagong Hukbong Bayan sa Western Mindanao at isinangkot sa pagkamatay ng isang elemento ng CAFGU nitong Hunyo 15 sa Clarin, Misamis Occidental. Aksidente siyang nakita ng kanyang asawa at mga kinatawan ng UCCP noong hapon ng Hunyo 30 sakay ng isang trak sa tapat ng Regional Trial Court ng Tangub, kung saan siya sinampahan ng gawa-gawang kasong iligal na pag-iingat ng mga eksplosibo. Bago ito ay hindi siya matagpuan sa mga himpilan ng militar at pulisya sa prubinsya.

**Hunyo 24.** Brutal na pinaslang si Dr. Rogelio Peñera, *chief epidemiologist* ng Department of Health sa Southern Mindanao at myembro ng Alliance of Health Workers

## Pang-aabusong militar sa Abra

**I**lang araw nang pinagbabawalan at hinaharang ng mga elemento ng 50th IB ang mga kamag-anak at kababayan ni Michael "Ka Tarius" Reyes na makuha ang kanyang bangkay sa Sityo Layaban, Barangay Beew, Tubo, Abra.

Si Reyes, isang Pulang mandirigma, ay napaslang nang makasagupa ng kanilang yunit ang mga tropa ng 50th IB sa Sityo Layaban noong Hunyo 6. Hindi nagawang maiatras ang kanyang bangkay. Kinabukasan, sinikap ng kanyang mga kamag-anak at kababayan na makuha ito. Sinuportahan sila ng mga upisyal ng bayan ng Tubo ngunit pinagbawalan pa rin ng mga elemento ng 50th IB na hanapin ang bangkay sa lugar na pinaglabanan. Umuwi sila makaraan ang apat na araw. Sa ngayon ay tiyak na naaagnas na ang bangkay ngunit hindi pa rin sila pinapayagan ng militar na makuha at disente itong mailibing.

Mahaba na ang listahan ng paglabag sa karapatang-tao ng 503rd Brigade at sa partikular ng 50th IB. Responsable ang 50th IB sa pagpaslang kay Pepe Manegdeg, lider-magsasaka ng Ilocos at paglapastangan sa mga bangkay nina Ka Braga at Sammy Rey "Ka Cholo" Cayago. Dinurog ng militar ang katawan at mukha ng mga biktima hanggang hindi na ito makilala. Responsable rin ang 41st IB sa North-Central Abra sa apat na araw na pagkakabilanggo at panggigipit sa tatlong sibilyan sa Cubcuba, Bangilo, Malibcong noong Mayo. Pinagbalingan ng galit ng militar ang mga sibilyan nang mabigo ang kanilang inilulunsad na mga operasyon.

Marami pang paglabag sa karapatang-tao ang tinatayang magaganap sa Abra habang pinatitindi pa ng militar ang mga operasyon nito para makapasok ang malalaking kumpanya ng pagmimina sa prubinsya.

AB



(AHW). Tinambangan siya at ang kanyang anak ng mga armadong nakasakay sa motorsiklo habang papauwi na sila sa Buhangin District, Davao City. Nagtamo ng maraming tama sa ulo at katawan si Peñera. Nasugatan naman sa braso ang kanyang 15 anyos na anak. Si Peñera ay dating pambansang tagapangulo ng AHW noong dekada 1990 at kasalukuyang kagawad ng panrehiyong konseho ng BAYAN. Myembro rin siya ng Health People United for the Removal of Gloria (PURGA), isang grupo ng mga propesyunal at manggagawang pangkalusugan na nananawagan sa pagbibitiw ni Gloria Arroyo.

**Hunyo 21.** Dinukot ng mga pinaghihinalaang ahenteng militar si Obito Marquez, 31, myembro ng

Kalipunan ng mga Samahang Magbubukid sa Timog Katagalugan (Kasama-TK) sa Occidental Mindoro. Bandang alas-10:00 ng gabi, kinukumpuni ng biktima ang metro ng tubig sa labas ng kanilang pansamantalang tirahan sa Taguig City nang dukutin siya ng mga armadong lalaki at sapilitang isakay sa isang *van* na may plakang nagsisimula sa mga letrang "PGG." Matapos itanggi ng PNP at AFP na hawak nila si Marquez, natagpuan siyang nakakulong sa Camp Crame nitong Hulyo 6. Si Marquez ay kabilang sa 72 militanteng aktibista ng Southern Tagalog na isinasangkot ng militar sa isang pananambang ng BHB sa Puerto Galera, Oriental Mindoro noong Marso 2006 na ikinamatay ng tatlong pulis.

AB

## Rehimeng Arroyo at AFP, idedemanda ng aktibistang Pilipino-Amerikano

**I**nianunsyo ng Pilipino-Amerikanong aktibista na si Melissa Roxas ang plano niyang labanan at idemanda ang rehimeng Arroyo at AFP dahil sa pagdukot at pagtortur sa kanya. Idineklara niya ito nang humarap siya sa midya noong Hunyo 28 sa Los Angeles, California, USA. Ito ang unang pagkakataong nagsalita sa publiko si Roxas tungkol sa kahindik-hindik niyang karanasan.

Sina Roxas at dalawa niyang mga kasamang sina Jun Carabeo at John Edward Jandoc ay dinukot noong Mayo 19 ng humigit-kumulang 15 mga ahenteng militar habang sila ay nagsasagawa ng sarbey para sa pinaplanong misyong medikal sa La Paz, Tarlac. Matapos siya isailalim sa interogasyon at tortur, pinakawalan si Roxas noong Mayo 25. Pinakawalan din sa mga susunod na araw sina Carabeo at Jandoc.

Ayon sa abugado ni Roxas sa US na si Arnedo Valera, plano nilang humingi ng danyos mula sa US Federal Court laban sa mga lumapastangan kay Roxas at laban sa gubyernong Arroyo. Bukod pa ito sa mga kasong isasampa sa mga kinanauukulang ahensya ng United Nations (UN) dahil sa mga paglabag sa mga karapatan ni Roxas na nakasaad sa International Covenant Against Torture, Covenant on Civil

and Political Rights, at Declaration of Human Rights ng UN.

Bago bumalik si Roxas sa US para magpagamot at magpagaling, ang abugado niya sa Pilipinas na si Rex Fernandez ay nagsampa rin ng petisyon sa Korte Suprema para sa *writ of amparo* ilang araw lamang matapos siya lumitaw. Dinidinig ngayon ng Court of Appeals ang petisyon ni Roxas. Plano niyang bumalik sa Pilipinas para dumalo sa nakatakdang pagdinig sa Hulyo 24.

Sinabi ni Roxas na bagamat mahirap para sa kanyang magsalita hinggil sa pangyayari, nais niyang ilantad ang ginawa ng gubyerno at militar ng Pilipinas sa kanila nina Carabeo, Jandoc at marami pang iba. Sinabi niya na kahit gaano man katagal ang abutin nito, ipursige niya ang paghahanap ng katarungan di lamang para sa kanyang sarili kundi para sa maraming iba pang biktima ng paglabag sa

karapatang-tao.

Sa kabilang banda, patuloy na itinatanggi ng rehimeng Arroyo na may kinalaman ito sa pagdukot at pagtortur kina Roxas, Carabeo at Jandoc. Binalewala ni Executive Secretary Eduardo Ermita ang mga sumbong ni Roxas at sinabing hindi ito nangyari, habang sinabi naman ng mga abugado ng gubyerno na kunwa-kunwarian lamang ang pagkakadukot sa kanya.

Samantala, naglunsad ng kampanya ang mga militanteng grupong kaanib ng BAYAN-USA para igiit ang katarungan para kay Melissa Roxas at itigil ang paggamit ng mga buwis ng mamamayang Amerikano para bigyan ng ayudang militar ang rehimeng Arroyo at tustusan ang mga paglabag nito sa karapatang-tao. Sinimulan din ang kampanya ng maramihang pagsulat kay US Sen. Barbara Boxer ng California, ang estado ng US na pinagmulan ni Roxas. Si Boxer ay myembro ng Senate Foreign Relations Committee at may malaking impluwensya kung paano ginagastos sa ibayong dagat ang mga buwis ng mamamayang Amerikano. AB



# Pinsala sa kalusugan ng isip dulot ng pasismo ng estado

**N**agdudulot ng pinsala sa kalusugan ng isip ng mamamayan ang pasismo at pagpapahirap ng rehimeng Arroyo. Militarisasyon sa mga komunidad sa kanayunan at kalunsuran ang pangunahing sanhi ng mga kaso ng pagkakasakit ng isip bukod pa sa mga sakit at pinsala sa katawan. Kalakhan sa mga pasyente ay biktima ng pasistang pandarahas.

Malalim na pinsala rin sa isip ang dinaranas ng mga dinadakup, ikinukulung, ginagahasa o tinortyur ng militar, gayundin ng kanilang mga kamag-anak, kabilang ang kamag-anak ng mga pinaslang, laluna ang mga bata na nakasaksi ng pasistang karahasan. Matinding bigwas din sa isip ang dulot ng mga dislokasyon, laluna sa mga bata at matanda na hirap umagapay. Dahil sa *stress* o pagkabagabag, apektado ang kanilang kalusugan at dumarami ang reklamong di makatulog, nangangasim ang sikhura

at alta-presyon.

**Pagtugon ng kilusan.** Matagal nang mulat ang rebolusyonaryong kilusan na bahagi ng pangangalaga sa kalusugan sa pangkalahatan ang pagharap sa usapin ng kalusugan ng isip. Ang sakit sa isip, tulad ng sakit sa ibang bahagi ng katawan, ay dapat at maaaring gamutin.

Ang rebolusyonaryong kilusan ay dati nang may manwal sa kalusugan ng isip na nagsisilbing gabay at sanggunian ng kinauukulang mga organo sa gawaing pangkalusugan. Binalik-aralan at nirebisa

ito kamakailan bilang bahagi ng patuloy na pagsisikap ng rebolusyonaryong sektor ng kalusugan na magpaunlad ng kakayahan.

Inaarmasan ang mga kasama ng kaalaman, angkop na pamamaraan at pagpapaunlad pa ng kakayahan sa pagtugon sa kalusugan ng isip hanggang sa antas ng mga platun, sangay at komite sa baryo. May mga nailulunsad nang pagsasanay ang iba't ibang yunit. Kulang man ang rekurso, gumagamit ang mga kasama ng mga alternatibo at murang paraan ng paggagamot tulad ng akupangtura at halamang gamot. Ang malalalang kaso naman ay dinadala sa mga alyadong eksperto o duktur. May iba namang yunit na may sarili nang kakayahan na mangalaga sa mga pasyente.

Saklaw ng serbisyong pangkalusugan ng rebolusyonaryong kilusan ang dayagnosis, pagpapagamot, *counseling* (propesyunal na pagpa-

## Kalusugan ng isip ng mga kasama

**A**ng pangangalaga sa kalusugan ng isip ay nagagawa sa pamamagitan ng mahigpit na pagtanggapan sa disiplina, mainit na samahan ng mga kasama, at patuloy na pagpapataas ng antas ng ideolohiya, pagkakaisa sa pulitika at mahusay na pamamalakad ng organisasyon. Ang tuluy-tuloy na konsolidasyon sa hanay ng mga kasama at masa ang susi sa malusog na pag-iisip, pagpapataas ng diwang palaban at pagbaka sa sikolohikal na pinsalang idinudulot ng pananalasa ng estado.

Dahil sa tuluy-tuloy na edukasyon at gawaing konsolidasyon, napananatiling mataas ang kanilang moral. Sa ganitong paraan epektibong nalalabanan ang karaniwang *stress* o presyur. Pero kailangan pa ring isaalang-alang ang pagkakaiba-iba ng bawat kasama sa pagharap sa presyur na maaaring humanatong sa pagkakasakit sa isip.

Sa karanasan, ang malawak na pag-unawa, pag-aaruga at suporta ng organisasyon at mga kasama ang naging susi sa lubusang paggaling at panunumbalik sa gawain ng mga kasamang nagkasakit sa isip. Sa hanay ng mga organisadong pwersa, mahalaga ang pag-unawa ng mga kasama, pag-alalay at pagtatasa sa kalagayan ng maysakit. Makabuluhan

ang papel ng kolektibo sa pagsusuri sa mga kaso, pagbubuo ng mga rekomendasyon, pagsubaybay sa pagtupad dito at paggabay sa mga nagkakaproblema sa isip.

Mahalaga ang papel ng mga namumunong organo sa pagkilala, pagbibigay ng prayoridad at pagpapahusay ng mekanismo sa pag-iwas o pagharap sa ganitong mga suliranin. Sa bahagi ng pasyente, susi ang pagpapaunawa sa kanya ng kanyang kalagayan. Sinisikap ng mga kasama na likhain ang pinakamainam na kundisyon para sa maysakit. Habang sumasailalim sa gamutan, dapat bigyan pa rin ang pasyente ng gawaing angkop sa kanyang kalagayan. Sa kaso ng mga Pulang mandirigma, itinatalaga sila sa mga gawaing hindi panghukbo.

Mahalaga ang pagkakaisa sa oryentasyon, kaalaman sa kalusugan ng isip sa hanay ng mga rebolusyonaryong pwersa at pagpapalaganap ng ganitong kaalaman sa iba't ibang antas. Bagamat kumprehensibo ang pagharap sa problema sa kaisipan, kailangang kilalanin na may isang antas na hindi na malulutas sa karaniwang mga prosesong pangorganisasyon at nangangailangan na ng interbensiyong medikal.

AB

payo), at pag-aalaga sa tulong ng mga kamag-anak.

Sa mga komunidad na sinasalanta ng Oplan Bantay Laya, sinisikap pakilusin ang mga komite sa kalusugan upang kapanayamin at pagpayuhan ang mga biktima para tulungan silang harapin ang malagim na karanasan sa kamay ng militar. Ang paggamot sa mga bata ay maaaring idaan sa laro tulad ng pagdodrowing at iba pang aktibidad upang matulungan silang mai-pahayag ang kanilang mga saloobin. Naglulunsad ng mga pangkulturang pagtatanghal at katulad na aktibidad na layong makabawas ng bigat sa isip at makagaan sa kanilang pakiramdam.

Higit sa lahat, patuloy na isinasagawa ang pampu-

litikang edukasyon at pagpapakilos sa masa. Patuloy silang pinupukaw at itinataas ang kanilang palabang diwa. Pinaiigting ang kanilang paglaban sa militarisasyon upang pigilang makapagdulot ng pinsala ang karamihan ng militar.

Ang gayong pampulitikang pakikibaka ang siya ring pangunahing nakatutulong sa pagpapalakas ng loob at kapasyahan ng mga biktima ng pagdakip, detensyon at tortyur ng militar. Nararamdaman ng biktima ang suporta ng mamamayan na siyang nagbibigay sa kanya ng inspirasyon na magpatuloy at magpursige sa pakikibaka. Naging mabisa rin ang suporta ng mga kamag-anak at iba pang nagmamalasakit. **AB**

## Si Ka Cesar, rebolusyonaryong ama at lider

**R**etirado na sa pultaym na serbisyo sa hukbong bayan si Ka Cesar. Bagamat may kalakasan pa ang katawan sa edad na 62, hirap na siya sa mahahabang lakaran bunga ng isang tama ng bala na malubhang puminsala sa isa niyang paa.

Ngunit para kay Ka Cesar, ang pagreretiro ay hindi nangangahulugan ng pagtigil sa rebolusyonaryong pagkilos. Sa katunayan, napa-kaaktibo pa niya sa gawain bilang kagawad ng isang lokal na sangay ng Partido at pampulitikang instruktur ng isang yunit ng milisyang bayan. Wala pa siyang planong tapusin ang may 35 taon nang pag-aambag sa rebolusyonaryong pagsisikap ng sambayanang Pilipino. "Hangga't kaya ng aking katawan, patuloy akong magseserbisyo sa rebolusyon," aniya.

"Sinisikap namin ngayong konsolidahin ang milisyang bayan," ani Ka Cesar. Malaking bagay na isa sa mga kalakasan niya ang kasanyan sa gawaing edukasyon. "Dapat laging matalas ang mga kadre ng Partido," aniya, kaya naman tuluytuloy ang pagsisikap niya sa pag-aaral, pagbabasa ng mga rebolusyonaryong babasahin at pakikinig ng balita sa radyo. "Nais kong magpakita ng halimbawa sa mga kasama ko sa lokalidad," dugtung niya.



Hindi birong sakripisyo ang pinagdaanan di lamang ni Ka Cesar kundi ng buo niyang pamilya sa mahabang panahon niyang pagkilos bilang rebolusyonaryong mandirigma at lider. Matinding pangigipit ng militar ang dinanas ng kanyang mag-iina mula pa noong bago siya magpultaym sa hukbong bayan. Di iilang beses na kinailangan nilang lumipat ng tirahan para pangalagaan ang kanilang seguridad. Ilang tirahan na rin nila ang sinunog ng kaaway sa pagtatangkang igupo ang kanilang paninindigan. Sa bawat bagong lugar na kanilang narating ay muli silang nagsimula at nagpatuloy sa pakikihamok. "Para kaming mga binhi na kahit saan itanim ng Partido ay kusang sumisibol at yumayabong," ani Ka Cesar.

Hindi nakapagtataakang maging kasintatag ni Ka Cesar ang kanyang mag-anak dahil ni minsá'y hindi siya naglubay sa pagsisikap na imulat at palahukin sila sa himagsikan. "Inorganisa ko sila," aniya. Mahig-

pit niyang nakatuwang ang kanyang kabiya na tuluy-tuloy ding kumilos bilang kagawad ng sangay ng Partido at lider ng kababaihan sa baryo. Hindi matatawaran ang gayon nilang pagsisikap lalupa't sumunod sa kanilang mga yapak ang anim nilang anak at lima sa kanila'y naging mga pultaym na mandirigma rin ng Bagong Hukbong Bayan. May lungkot ngunit buongkarangalang binanggit ni Ka Cesar na dalawa na sa kanyang mga anak ang nagbuwis ng buhay para sa rebolusyonaryong adhikain. Dalawang linggo lamang ang pagitan ng pagkasawi ng dalawa sa labanan ilang taon na ang nakalipas.

"Hindi namin ipagkakait sa kilusan ang aming mga anak," ani Ka Cesar. Masakit man sa kanilang mag-asawa ang pagkamatay ng dalawang anak, buong-puso nila itong tinanggap bilang bahagi ng kinakailangang sakripisyo. Aniya, pati kanilang mga apo ay pinapan-day nila para sumunod sa tinahak nilang landas. "Bago man lang ako pumanaw, gusto kong makitang ipinagpapatuloy ng mga apo ko ang pakikibaka."

Sa walang pagod niyang pamamatnubay at pagpapamalas ng mabuting halimbawa, hindi malayong matupad ang hinahangad ni Ka Cesar. **AB**



# Pinatitinding mga gerang agresyon ng US

**P**atuloy na inuudyok ng imperyalismong US sa ilalim ng bagong administrasyong Obama ang mga gera sa pinaghihinalaan nitong mga kuta ng al Qaeda. Bagamat nangako si Obama na babawasan ang mga tropang Amerikano sa Iraq, inuunti-unti pa ito at may nananatili pang 130,000 tropang Amerikano na aabutin pa ng dalawang taon doon.

Tahimik ang rehimeng Obama tungkol sa mahigit 100,000 armadong "kontratistang sibilyan" doon na sa katunaya'y mga mersenaryong dinala ng mga kumpanyang tulad ng Blackwater para maikutan ang limitasyon sa bilang ng sundalong maaaring ideploy doon. Sa katunayan, balak pang dagdagan ang mga mersenaryo kapalit ng mga iniuwing regular na tropang Amerikano.

Mariin naman ang panawagan ni Obama para sa mas matindi pang interbensyong militar sa Afghanistan at kalapit na Pakistan. Sa unang pagkakataon, mas malaki na ang taunang gastos sa gera ng US sa Afghanistan kumpara sa Iraq.

Noong Pebrero, iniutos ni Obama ang pagdaragdag ng 20,000 tropa sa Afghanistan. Aabot na sa 68,000 ang bilang ng mga sundalong Amerikano roon ngayong taon, doble ng bilang nila noong katapusan ng 2008. Sa ngayon pa lamang, umaabot na sa 80,000 ang bilang ng mga pinagsamang pwersa ng US at NATO roon. Dagdag pa rito ang 5,000 mersenaryo.

Mula pa noong 2005 ay libu-libo nang mga sibilyang Afghan ang napapatay ng mga pwersa ng US at NATO, karamihan dulot ng pambobomba ng mga eroplano. Isang gayong insidente ang naganap noong Agosto 22, 2008, kung saan umaabot sa 91 sibilyan ang napatay sa anim na oras na pambobomba at pang-aatake ng mga pwersa ng US sa isang nayon sa Azizabad. Mayor-ya rito ay mga bata (61) at ang 15 ay kababaihan. Nakagawian na ng

US na salakayin ang mga pagtitipong katulad ng mga kasalan, libing at iba pa dahil kontra-US daw ang anumang malakihang pagtitipon ng mga Afghan.

Ang gera sa Afghanistan ay sumaklaw na sa Pakistan. Pinasahol pa ng rehimeng Obama ang dating kalakaran ng rehimeng Bush ng pagpapalipad ng mga *attack drone* na Reaper at Predator. Mula noong

nakaraang taon ay nagpalipad ang US ng mga *drone* nang mahigit 35 beses mula sa hilagang-kanlurang Pakistan. Nagresulta ito sa lumakipang bilang ng mga kaswalting sibilyan. Bunga nito, lumalakas ang mga protesta sa Pakistan at instalidad sa loob ng bansa.

Bagamat nagpapahayag ng pagkontra sa ilang naging patakaran ni Bush, ang mga aksyon ni Obama ay nagpapakita na wala siyang pinag-iba sa binabatikos niya noon dahil tuloy ang paghahasik niya ng gera at kaguluhan sa Middle East at Central Asia. **AB**

## Pambobomba ng mga *drone*

**H**indi bababa sa 90 katao ang napatay sa Pakistan nang walang patumanggang magpaulan ng mga bomba ang mga *drone* (eroplanong walang piloto) ng US sa South Waziristan noong Hunyo 25.

Unang nambomba ang isang *drone* sa Wana, South Waziristan dahil sa hinala ng US na kuta iyon ng Taliban. Umabot sa 45 ang napatay. Kinahapunan, binomba ng US ang mga nagtipon para sa libing ng mga namatay. Umabot muli sa 45 ang napatay at ilampu pa ang nasugatan. Tatlong bomba pa ang pinakawalan ng *drone* habang nagpupulasan ang mga dumadalo sa libing.

Bagamat walang patunay, sinasabi ng US na napatay sa pambobomba ang tatlo sa pinakamatataas na upisyal ng Taliban. Ang hindi maipagkakaila ay ang napakaraming kaswalting sibilyan.

Ang insidenteng ito ay pinakahuli lamang sa mahabang listahan ng pangmamasaker ng US sa mga sibilyan sa pamamagitan ng pambobomba sa lugar. Pagkaupung-pagkaupo ni Obama sa White House, iniutos niya ang pagpapatindi ng pambobomba roon.

Pinalalabas ng rehimeng Obama na ang mga pambobomba ay nagresulta sa pagkamatay ng 20 pinakamatataas na upisyal ng al Qaeda na nagtatago sa hangganan ng Pakistan at Afghanistan. Noong Abril, inilathala ng isang pahayagan sa Pakistan ang mga pangalan ng 687 sibilyang napatay (kabilang ang 14 na umano'y upisyal ng al Qaeda) sa mahigit 60 beses na pambobomba. Sa bawat upisyal umano ng al Qaeda na napatay, 50 sibilyan ang nadamay.

Ayon naman sa ibang mamamahayag, napakaartbitrario ng mga pamamaraan ng Central Intelligence Agency sa pagtukoy ng mga target ng mga *drone*. Umuupa lamang ito ng mga ahente para maglagay ng mga elektronik na pantukoy sa mga bahay ng mga pinaghihinalaan at ang mga iyon ang tinatarget ng mga *drone*. **AB**

## Mga kilos-protesta laban sa *cha-cha*, idinaos

EKSAKTONG isang taon bago ang takdang pagtatapos ng termino ni Gloria Arroyo, nagdaos ng “Martsa laban sa Cha-cha” ang mahigit 5,000 raliyista bandang alas-6 ng gabi noong Hunyo 30 sa Liwasang Bonifacio sa Maynila.

Malaking bulto ng mga demonstrador ay mga estudyante mula sa Pamantasan ng Lunsod ng Maynila, Polytechnic University of the Philippines, University of the Philippines, De La Salle University, College of St. Benilde, St. Scholastica’s College, Adamson University, Arellano University at Jose Rizal University.

Sumama rin ang mga kasapi ng Manila City Hall Employees. Bitbit ang istrimer na “Manilans Resist Charter Change (MARCHA)”, pina-ngunahan ni Mayor Alfredo Lim ang delegasyon patungong Liwasang Bonifacio. Nagpakita rin ng kaniyang suporta sa kilos protesta ng mga estudyante ang mga progresibong kinatawan ng Bayan Muna, Anakpawis, GABRIELA at Kabataan Party at mga personaheng tulad ni na Rodolfo “Jun” Lozada, direktor ng pelikulang si Carlitos Siguion-Reyna at asawa niyang si Bibeth Orteza, biyolinistang Cookie Boli-pata at National Artist Bien Lumbera.

Hindi nagtapos ang mga kilos protesta rito dahil nito namang Hulyo 2 at 3 ay sinimulan ng mga estudyante at kapanalig nila ang sama-samang pag-iingay laban sa *con-ass*. Ang pinakahuling pag-iingay ay inilunsad ng mga estudyante ng Ateneo de Manila University, Miriam College at University of the Philippines. Lingguhang pag-iingay ang gagawin nila hanggang sa State of the Nation Address (SONA) ni Arroyo sa Hulyo 27.

Sa bisperas ng SONA, maglulunsad ng mga lakbayan ang mga pwersang anti-Arroyo. Magtitipuntipon sila sa hapon ng Hulyo 27 para magdaos ng alternatibong SONA sa Commonwealth Avenue na malapit sa Batasan complex, Quezon City. May plano ring magdaos ng *vigil* sa paligid ng Batasan Complex para pigilan ang mga alyado ni Arroyo sa Mababang Kapulungan na baguhin ang konstitusyon para makapagpalawig pa sa poder si Arroyo.

Samantala, mga tatlong linggo pa lamang bago idaos ang ika-siyam na SONA ni Arroyo ay tumitin-di na ang militarisasyon ng Metro

Manila. Binuo ng Philippine National Police (PNP) ang Task Force Kapayapaan na pinamumunuan ni Chief Supt. Roberto Rosales ng PNP-National Capital Region para tiyakin umano ang seguridad sa SONA. Magdaragdag pa raw sila ng mga pulis batay sa kanilang pagtaya ng sitwasyon sa harap ng umano’y banta ng destabilisasyong binansagang “Oplan August Moon.”

Anang Bagong Alyansang Makabayan, ang napakaraming mga pwersang panseguridad ay kalabisan na at malamang na ang tunay na layunin nito ay supilin ang mga kilos protesta laban sa rehimeng Arroyo.

### Rehimeng Arroyo, kinundena ng IADL

KINUNDENA ng mahigit 200 delegado ng 17th Congress of the International Association of Democratic Lawyers (IADL) ang mga pamamulang at panggigipit ng rehimeng Arroyo sa mga abugado at huwes sa Pilipinas. Idinaos sa Hanoi, Vietnam noong pangatlong linggo ng Hunyo ang naturang kongreso na dinaluhan ng National Union of People’s Lawyers (NUPL) mula sa Pilipinas.

Nanawagan ang IADL sa United Nations Special Rapporteur on the Independence of Lawyers and Judges na imbestigahan ang naturang mga pang-aatake. Mahigit 40 abugado at mga huwes na ang napapaslang mula nang manungkulan si Gloria Arroyo. Gayundin, binatikos ng IADL ang pagtanggigil ng rehimeng Arroyo na seryosong imbestigahan at sampahan ng kaso ang mga pwersang panseguridad ng estado na pasimuno ng mga paglabag sa karapatang-tao.

Nanawagan din ang IADL na itigil ang panunupil sa Pilipinas at muling idaos ang usapang pangkapayapaan sa pagitan ng Gubyerno ng Republika ng Pilipinas at ng National Democratic Front. Nanawagan din ito sa gubyernong US na itigil na ang pagbibigay ng ayudamilitar sa rehimeng Arroyo at ihinto ang lahat ng tipo ng panghihimasok-militar sa Pilipinas, laluna ang pagpapadala ng mga tropang Amerikano.

Ang IADL ay pandaigdigang organisasyon ng mga abugado sa karapatang-tao mula sa 100 bansa na itinayo noong 1947. Ito ay may katayuang konsultant sa United Nations Economic and Social Council at United Nations Educational, Scientific and Cultural Organization (UNESCO).

## Mga Austrian, sumuporta sa mga manggagawa ng Nestlé

NAGLUNSAD ng piket ang mga Austrian at mga Pilipino sa harapan ng upisina ng Nestlé sa Austria bilang suporta sa laban ng mga manggagawa ng Nestlé sa Cabuyao, Laguna.

Ayon sa Philippine Solidarity and Friendship Group (PSFG), patuloy na ipinagkakait ng Nestlé Philippines ang Retirement Plan Benefits na nakapaloob sa kanilang Collective Bargaining Agreement halos 20 taon na ang nakalilipas. Kabilang dito ang karampatang benepisyo para sa mga retiradong manggagawa at mga pamilya nila.

Binatikos din ng PSFG ang karahasan ng Nestlé Philippines at rehimeng Arroyo sa mga manggagawa nito, kabilang ang pagpatay sa lider-union na si Diosdado "Ka Fort" Fortuna na pinaslang ng mga armadong galamay ni Arroyo noong Setyembre 22, 2005; mga pagbuwag sa welga nito; at pagsasampa ng mga gawa-gawang kaso laban sa mga kasalukuyang lider ng union. Naglabas din ang PSFG ng petisyon sa internet upang igiit sa punong tanggapan ng Nestlé sa Switzerland ang karapatan ng mga manggagawa ng Nestlé Philippines na makipagnegosasyon.

## Ka Wilson ng KMU, pumanaw na

PUMANAW na noong Hulyo 1 si Ka Wilson Fronda Baldonaza, 55, pangkalahatang kalihim ng Kilusang Mayo Uno (KMU). Ilang linggo na siyang nakaratay matapos siya dumanas ng *stroke* noong Hunyo 5.

Pinarangalan siya ng KMU, Bagong Alyansang Makabayan, Anakpawis, Bayan Muna at iba pang progresibong organisasyon noong Hulyo 3. Ayon sa KMU, isang masipag na lider obrero at mahusay na guro si Ka Wilson sa kanyang kapwa manggagawa at mamamayan.

Si Ka Wilson ay naging kasapi noon ng Samahan ng Demokratikong Kabataan (SDK) at nag-organisa rin sa kanyang bayan sa Victoria, Tarlac bago pa ipataw ang batas militar noong 1972. Pinamunuan niya ang union sa Mabuhay Textile Mills noong 1985 at naging pangkalahatang kalihim ng BAYAN sa Valenzuela noong 1987-1990. Taong 2000 nang maging tagapangulo siya ng Alliance of Nationalist and Genuine Labor Organizations (ANGLO) at noong 2007 ay nahalal bilang pangkalahatang kalihim ng KMU.

## Promosyon ng 3 upisyal, binatikos

NAKIISA ang Partido Komunista ng Pilipinas (PKP) kay Edita Burgos sa pagbatikos kay Gloria Arroyo sa pagbibigay ng promosyon sa mga upisyal ng militar na sangkot sa pagdukot sa kanyang anak na si Jonas noong Abril 2007.

Iniangat nitong Hunyo bilang koronel sina Lt. Col. Noel Clement, Lt. Col. Melquiades Feliciano and Lt. Col. Edison Caga, mga upisyal ng 56th IB na nakabase sa Norzagaray, Bulacan. Sa imbestigasyon sa kaso, napag-alaman na nakagarahe sa kampo ng 56th IB ang kinumpiskang saksyang may plakang TAB-194, na ikinabit sa saksyang ginamit sa pagdukot kay Jonas.

Sa kabila ng malinaw na mga ebidensya, pinawalang-sala ng militar ang naturang mga upisyal sa mga akusasyong sangkot sila sa pagdukot.

## Tanggalan sa Triumph, binatikos

UMAABOT sa 1,662 manggagawa ng Triumph International at Star Performance Incorporated, pinakamalaking pagawaan ng bra at *panty* sa bansa ang nanganganib na matanggal sa trabaho sa napipintong pagsasara ng kumpanya sa Agosto.

Ayon sa Bagong Pagkakaisa ng mga Manggagawa ng Triumph International, hindi makatwiran ang gagawing pagsasara ng kumpanya. Mangangahulugan lamang ito ng malawakang tanggalan at patuloy na kahirapan sa mga pamilya ng maaapektuhang mga manggagawa. Ayon kay Isabelita Dela Cruz, tagapangulo ng union, iligal ang hakbangin ng Triumph dahil nilabag nito ang Collective Bargaining Agreement (CBA) sa pagitan ng mga manggagawa at kumpanya. Nagbanta pa umano ang Triumph na hindi magbibigay ng anumang benepisyo kapag tinutulan ng mga manggagawa ang pagsasara.

Binatikos ng union ang pasya ng maneydsment na isara ang kumpanya dahil sa epekto ng pandaigdigang krisis sa pinansya. Anila, milyun-milyong dolyar ang kinikita taun-taon ng Triumph na pag-aari ng isang kumpanyang German at may umaabot sa 40,000 manggagawa sa buong mundo. Dagdag pa nila, ang pagsasara ay pag-atake sa mga karapatan at kagalingan ng mga manggagawa dahil magreresulta ito sa malawakang tanggalan sa iba't ibang bansa.

Sinisi rin nila ang rehimeng Arroyo na siyang pangunahing protektor ng Triumph International dahil sa pagsuporta ng Department of Labor and Employment (DOLE) sa planong pagsasara ng kumpanya.

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XL Blg. 13  
Hulyo 7, 2009  
[www.philippinerevolution.net](http://www.philippinerevolution.net)

Editorial

## Lubusang biguin ang OBL2

**B**igung-bigo ang kontra-rebolusyonaryong kampanyang Oplan Bantay Laya 2 (OBL2) ng rehimeng US-Arroyo at ng Armed Forces of the Philippines (AFP). Sa kabila nito, pinalalabas pa rin nilang madudurog na ang Bagong Hukbong Bayan (BHB) bago matapos ang kasalukuyang termino ni Gloria Arroyo sa 2010. Palagian pa rin nilang sinasabi na bunga ng kampanyang militar na OBL2, ilampu nang mga larangang gerilya umano ang nalusaw at libu-libo nang mga pwersa ng hukbong bayan ang nalagas.

Kabaligtaran ang ibinunga ng OBL2. Lalong lumalawak ang hukbong bayan dahil sa galit ng masa sa inihahasik nitong kalupitan, sa sobrang pagkabanat ng mga pwersa ng kaaway at sa determinasyon at pagkatuto ng mga rebolusyonaryong pwersa sa paglaban. Dumarami sa halip na nabawasan ang mga larangang gerilya. Nagagawa ng BHB na maglunsad ng di bababa sa isang taktikal na opensiba bawat araw.

Maraming mahahalagang aral na natututunan ang mga rebolusyunaryong pwersa at masa sa harap ng pinag-ibang bangis n g OBL. Ang pinakamahalaga rito'y habang lalo silang inaapi, sinusupil at ginigipit, tiyak na lalaban at lalaban ang mamamayan.

Mula nang ilunsad ang OBL2, ilan lamang sa mga lugar kung saan pinakamatingkad ang pagkabigo nito ang Mindanao, Eastern Visayas, Panay, Negros, Southern Tagalog at Bicol. Sa mga lugar na ito, walang nawasak ang kaaway ni isang larangang gerilya sa kabilang ng pinatindi at malalaking operasyong militar.

Umaasa ang rehimeng US-Arroyo na makababawi ito sa mga kabiguan at pagkatalo at makapagpapakita ng lakas militar upang mapangatawanan ang paghahangad nitong makapangunyapit sa poder lampas pa sa 2010. Habang papalapit na ang itinakda nitong dedlayn, desperadong nagkukumahog ngayon ang naghaharing rehimen sa lalong walang habas na pananalakay, pamamaslang, panliligalig, intriga, paninira, kasinungalingan at iba pang pang-aa-

buso. Milyun-milyong mamamayan ang mabibiktima ng pinaigting na mga pasistang pananalakay.

Sa mga nalalabing buwan ng taong ito hanggang sa tanging ng OBL2 sa susunod na taon, haharapin ito ng lahat ng rebolusyonaryong



**Mga tampok sa isyung ito...**

**Mga pakanang ala-Marcos**

PAHINA 3

**8 armas nasamsam sa reyd sa Agusan del Sur**

PAHINA 6

**Si Ka Cesar, rebolusyonaryong ama at lider**

PAHINA 10

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa [angbayan@yahoo.com](mailto:angbayan@yahoo.com)